

摘藻堂四庫全書薈要

經部

欽定四庫全書薈要

經部

詩集傳名物鈔卷二



欽定四庫全書薈要卷一千一百二

經部

詩集傳名物鈔卷二

元 許謙 撰

邶之三

變一

程子諸侯擅相侵伐衛首并邶鄘之地故為變風之首

傳分自紂城朝歌而北謂之邶南謂之鄘東謂之衛此從鄭譜說也疏謂此無文驗其水土之

名知之傳又謂邶鄘不詳始封今案史記武王克商封紂子祿父殷之餘民漢地理志河內本殷之舊都周既滅殷分其畿內為三國邶鄘衛是也邶以封武庚詩傳既云自朝歌分為三則武庚之國似無處所參以地志之說則若可通但又以鄘衛為管蔡之所尹則恐非事實也

傳○邶蒲對反鄘音容行戶剛反○殷王武乙二祀自亳遷都朝歌歷太丁帝乙而至紂○漕音曹墟

丘於反澶時連反相息亮反濮博木反

柏舟

邶

莊姜不見答 異

經

一章言柏舟則宜以載物乃汎汎於水中而無  
所用以此喻已故耿耿而憂思至於不能寐如  
有所隱痛之憂非無酒以自樂然此憂非酒之  
所能遣也二章承上言鑒明則可度物我心憂  
煩不能度物不知何以處此歸而告諸兄弟聊

以舒此憤爾而又逢彼之怒是兄弟亦不可據  
憑而終莫知所以自處也三章於是自反平昔  
我心貞固過於石而不可轉我心平直過於席  
而不可卷威儀動止之間皆無一失而不必選  
而不見答於君子豈我之過哉石不可轉是其  
貞潔自守之操堅席不可卷是其公平逮下之  
心溥也四章謂我之憂者自揆無過正以見怒  
諸妾讒譖而致然默而思之無可奈何惟拊心

而已卒章再言上下失序所以憂不能解但恨不能飛去爾憂之極止曰不能奮飛可謂正而不深怨矣

傳○一章汎芳劍反紐音今易字梵反○語錄問汎彼柏舟亦汎其流注作比義看來與睢鳩在河洲無異彼何以為興曰他下面便說淑女見得是因彼興此此詩纔說柏舟下面更無貼意見得其義是比○緻直利反密也

此詩舊說男子作朱子以為婦人詩蓋觀其辭  
氣而得之以卑順柔弱四言舉一篇大旨此讀  
詩凡例也讀詩者每於一篇吟哦上下優游涵  
泳以意隨之而求詩人志之所在庶不負朱子  
之教也

二章度待洛反○四章標符小反類隔切今易並  
小反○卒章垢舉后反憤古對反心亂也眊莫冒  
反目不明貌



序○頃去營反○傳強其兩反定丁佞反傳音附謚  
神至反斷都亂反冠古玩反○史記康叔之子康  
伯六世皆書伯至頃侯厚賂周夷王王命為衛侯  
索隱曰康誥命爾侯于東土又云孟侯則康叔已  
為侯也子康伯即稱伯謂方伯耳非降爵也頃侯  
德衰不監諸侯乃從本爵非賂王而稱侯也○謚  
法甄心動懼曰頃甄之人反積也銜音眩扼於革  
反懟徒對直類二反怨也

綠衣二邶莊姜歎失位

經○疏一章以表裏興幽顯二章以上下喻尊卑○  
詩緝綠衣黃裏言掩蔽而已綠衣黃裳則貴賤倒  
置夫人失位矣○詩緝綠兮衣兮不可但言是綠  
色之衣當玩味兩兮字詩有黃鳥白華不言兮唯  
此曰綠兮衣兮蓋綠字衣字皆有意義綠以喻妾  
衣以喻上僭故以二兮字點掇而丁寧之

三章綠之所以成綠而為衣者人以絳染治而

成也妾之所以上僭者以君子嬖之而然也上  
綠字已包前章衣字在內

語錄我思古人實獲我心言古人所為恰與我相  
合只此便是至善前乎千百世之已往後乎千百  
世之未來只是此箇道理孟子所謂得志行乎中  
國若合符節政謂是爾

首章言已為賤者所掩蔽次章則貴賤易位矣  
然此但就妾身而言三章則言妾僭之由皆在

於君子末章則深達乎事逐時變物隨氣遷理  
勢之常無足怪者尚何憂悴之有蓋絺綌夏服  
也今風而淒其則固宜屏之不服有如扇捐篋  
中之言而又絕無彼留戀恩情之意故三章之  
思古人尚欲得處此之道而效之末章之思古  
人反謂之獲我心是在我者處之素定而古人  
善處此者反得我心之所同然者耳至此豈有  
一毫怨懟不平之氣哉此莊姜所以為賢也

傳○一章綠東方之間色謂蒼與黃二色相間雜而  
成綠○題下春秋隱公三年左氏傳衛莊公娶于  
齊東宮得臣之妹曰莊姜美而無子又嬖於妾而  
生州吁莊從夫謚姜姓也

燕燕邶三莊姜送戴嬀

經○一章泣無聲出涕也涕土禮反目汁也

傳○一章鳥拔反○之子于歸他詩皆言嫁歸之  
歸惟此詩謂歸父母之家故曰大歸大歸者不反

之辭○左氏傳莊公又娶于陳曰厲嬀生孝伯早死其姊戴嬀生完莊姜以為己子公卒完立是為桓公隱公四年州吁弑桓公故戴嬀大歸于陳厲戴皆謚嬀陳姓也嬀居為反

三章上音時掌反而下字無音案字書元在物下之下則上聲自上而下之下則去聲凡與自下而上之上對義者皆當作去聲讀後同

日月四邨莊姜不見答

在燕燕前

經○卒章畜許六反

四胡能有定期之之辭也謂令其心回惑何時而能定乎此莊姜忠厚之意也朱子說是已然之辭

終風

邶五莊姜

在燕燕前

經

莊姜賢夫人也所思者大矣國君及夫人父母一國而國人作則者也莊公無君人儀度其曰

終風曰暴曰霾  
暄陰雷曰譔  
浪笑傲為君如此  
果足以正一國乎  
夫人賢而不見  
荅果足以示  
人齊家之道乎  
國君之家不齊  
則一國之家不  
齊一國之家不  
齊則國殆矣  
夫人之中心是  
悼悠悠之思寤  
而不寐願言而  
嚏而懷所思者  
大矣非情欲之  
謂也儻莊姜為  
思情欲之人則  
譔浪笑傲而必  
喜陰暄虺雷而  
必怒矣○顧我  
則笑是不禮其  
夫人而不能相  
敬如賓可見



傳○一章疏日出而風為暴又曰陰雨不興而大風  
暴起○二章霾亡皆反類隔切今易謨皆反○雨  
王遇反霽謨逢蒙弄二反○疏風而雨土為霾又  
曰大風揚塵土從上下也○三章詩記陰風終日  
意其止矣不旋日而又曠焉厭苦之辭也○孰巨  
尤反病寒鼻塞也

擊鼓

邶

從軍者怨州吁

經○李氏州吁安於用兵踴躍欣喜不自勝也○漕

音曹○詩記從孫子仲平陳與宋言所從者乃孫子仲也輕其帥可知末章承上章而足成其義

傳○兵行馬下本不須叶欲從上句鏜處而叶也然詩中第一句無韻者甚多末章闊活正不須叶信字當正作師人切恐非叶或本誤爾○一章通典滑州白馬縣衛國曹邑戴公廬于曹即此○鋒音峯兵端也鎬音滴矢鋒也○二章左氏傳隱公元年鄭共叔之子滑奔衛衛人為之伐鄭取廩延鄭

人以王師號師伐衛南鄙二年鄭人伐衛三年宋  
穆公疾召孔父而屬其兄之子殤公使公子馮出  
居鄭公卒而殤公立四年衛州吁弑桓公而自立  
將修先君之怨於鄭而求寵於諸侯使告於宋曰  
君若伐鄭以除君害君為主敝邑以賦與陳蔡從  
宋人許之夏宋陳蔡衛伐鄭圍其東門五日而還  
秋四國復伐鄭敗鄭徒兵取其禾而還朱子曰圍  
鄭五日而還出兵不為久而人怨之如此者身犯

大逆衆叛親離莫肯為之用爾

凱風

邶七

孝子

經○三章浚音峻子金子爰有寒泉在浚之下言寒泉但在浚之下而不能上灌注其浚以比子不能養母有子七人而反使母受勞苦

傳○一章疏南風長養萬物喜樂故曰凱風凱樂也長知丈反○字書棘如棗而多刺木堅色赤叢生人多取以為藩歲久而無刺亦能高大如棗木色

白為白棘實酸者為臽棘○三章通典寒泉在濮  
州濮陽縣東南水經注濮水枝津東逕浚城南而  
北去濮陽三十五里城側有寒泉岡即詩爰有寒  
泉在浚之下○卒章睨睨毛氏好貌箋以興顏色  
悅也詩緝光鮮貌檀弓華而睨睨明貌睨從目從  
見亦以色言之俗訛以為黃鳥之聲

今案睨睨字在黃鳥上其下別言載好其音睨  
睨與音字文意似不連宜詩緝說是

雄雉邶婦人思其夫 異

經○詩記凡百君子我固不知孰為德行也但不忤求則何用不善

傳○一章遺以季友○二章下上見燕燕

匏有苦葉邶刺淫亂 異

經○三章箋歸妻使之來歸於已

此詩一章以水喻禮涉是徒步渡水之名水淺可涉則是合禮而可行者也水深險而不可涉

則是非禮而不可行者也今濟處有深涉是不可涉者也況匏尚未可為浮渡之器乎以比非禮絕不可行之事是指淫亂而言也然於可渡處又當分擇深淺以厲以揭比事有合禮可行而又須擇義謂雖於禮可成男女之好又擇義而行之可也大抵四句作兩截看深涉之深非深厲之深深涉是水太深而不可涉者下面是水可涉而又就其中度淺深而揭厲也二章正

刺不度禮義非其妃耦犯禮相求濟盈不濡軌  
應一章下兩句雉鳴求其牡應一章上兩句三  
章言昏禮之正即深厲淺揭之意而濟盈不濡  
軌之反四章言非類不可從即濟有深淺之意  
而雉鳴求其牡之反

傳○一章瓠胡故反埤雅長而瘦上曰瓠短頸大腹  
曰匏毛氏匏謂之瓠誤矣蓋匏苦瓠甘復有長短  
之殊非一物也國語叔向曰苦匏不材於人共濟



而已古今注匏之有柄者曰懸瓠可用為笙共九  
用反○釋文厲說文作𦍒云履石渡水音同○二  
章毛氏由輶以上為軌釋文云依傳意宜音犯軌  
車轍也從車九聲龜美反軌車軾前也從車凡聲  
音犯諸家說詩皆以為轍無不濡之理當作軌字  
或為軻○今案周禮輶人疏轍廣謂之軌轂末亦  
為軌黃公紹古今韻會引說文軌車轍也又車軸  
謂轄頭也轄即車軸之端貫轂者車輪有高下有

廣狹皆定於軌輪中之軌既同則轍迹亦同後人  
因謂車轍亦曰軌曲禮塵不出軌以高下言也中  
庸車同軌以廣狹言也蓋兵車乘車之輪其崇六  
尺六寸軌居輪之中若濡軌則水深三尺三寸孔  
疏以為轍迹非也以是言之則此章軌字不必改  
作軌但不作轍說可也轉音舟穀音穀轉音衛端  
音端○三章迎宜慶反○卒章號戶羔反

谷風

邶婦人見棄於夫

經○一章詩緝黽勉猶勉強也力所不堪心所不欲而勉強為之皆謂之黽勉黽莫尹反

三章逝有踰越之意苟置於梁以待魚發起之則不可得魚矣毋逝我梁謂勿踰越我成家規模毋發我笥謂勿敗我所為之事雖去而猶有顧其家之意

四章亡與無同○五章售賣物去手也○卒章詩記肄習也詒我以武暴忿怒習以為常

傳○一章爾雅東風謂之谷風疏谷之言穀穀生也

谷風者生長之風也○蔓音萬俗呼作瞞菁音精  
箋封蔓菁之類釋文今菰菜也江南有菰江北有  
蔓菁相似而異本草蔓菁即蕪菁梗短葉大連地  
上生闊葉紅色春食苗夏食心秋食莖冬食根河  
朔尤多又曰根細於溫菰溫菰今蘆菔也菰音蒿  
蘆音盧菔音服即蘿蔔○菰音福疏非似菰爾雅  
謂之葸菜河內謂之菰菜爾雅非葸菜注似蕪菁

華紫赤色可食又菑菑疏根如指正白可啖蔥音

息菑音宿○二章畿門內毛氏說也疏畿者期限之名周禮九畿王畿皆期限之義經云不遠言至有限之處故知是門內詩記韓愈遣瘧鬼詩白石為門畿蓋以畿為門閫必有所據可以發明毛氏之說○爾雅荼苦菜疏味苦可食之菜生於秋經冬歷春乃成月令孟夏苦菜秀是也葉似苦苣而細斷之有白汁花黃似菊堪食但苦耳

案傳茶苦菜蓼屬詳見載芟是引以薺茶蓼句也此句在良耜言載芟誤而茶蓼之茶乃穢草非菜也爾雅謂之委葉字作荼與苦菜之茶是兩物傳亦誤薺呼高反荼音茶

薺本草味甘葉作菹及羹佳○更平聲○三章地理志涇水出安定郡涇陽縣西開頭山東南至馮翊陽陵縣入渭過郡三行千六十里師古曰开音苦見反又音牽此山在靈州東南俗訛謂之汧屯

山通典平涼郡原州平高縣即漢高平縣

屬安定

有

笄頭山亦曰沂屯山涇水所出○前編渭自鳥鼠至入河一千八百七十里○馮皮冰反翊逸織反堰於建反○四章語錄問就其深矣四句集傳以爲興體疑是比體荅曰若無下面四句即是比既有下四句則只是興凡此類皆然非獨此章也○遽其據反○五章女音汝○語錄問育恐育鞠張子之說推之下文及爾顛覆意不甚貫不若前說

為順答曰姑存異義耳然舊說亦不甚明白○卒章項安世家說洸為武取武夫洸洸之意案說文洸水涌出也引詩此句為證徐鍇注言其勇如水之涌也如此說則武之義明

式微

邶十

黎臣

經

兩章上二句勸歸之辭下二句怨辭也晏子曰君為社稷死則死之為社稷亡則亡之若為已



死已亡非其私暱誰敢任之今曰微君之故又  
曰微君之躬似黎侯有為已亡之意蓋黎侯必  
有不君致亂之階而召狄故其謂所以濡於中  
露陷於泥中者為君之躬故耳否則主危臣憂  
主辱臣死又何有胡為乎之怨乎

傳○一章芘必至反覆乎救反○黎侯失國事見旄  
丘序下傳○二章難乃旦反

旄丘

邶十

黎臣責衛

經○一章誕徒旱反

傳○一章詩記葛始生其節蹙而密既長其節闊而  
疎○三章玉藻君子狐青裘豹褰玄綃衣以裼之  
注君子大夫士也褰與袖同裼先歷反○女音汝  
憤古對反○左傳注黎侯國上黨壺關縣有黎亭  
序○箋伯者州伯疏王制五國以為屬屬有長十國  
以為連連有帥三十國以為卒卒有正二百一十  
國以為州州有伯殷之州長曰伯虞夏及周曰牧

周謂之牧而云方伯者以一州之中為長

此釋序文傳不

此用

簡兮

邶十

賢者仕於冷官

經○一章子金子日之方中在前上處言日正中時

在庭前堂上以俟舞列○詩記日之方中至明而易見之時在前上處至近而易察之地於是焉不能察而用所以刺也朱子以明顯二字該之○卒章詩記山則有榛隰則有苓唯西州然後有此人

傳○一章易以豉反○疏舞謂之萬者何休云象武王以萬人定天下民樂之故名之商頌亦曰萬舞有奕殷亦以武定天下也詩記萬舞二舞之總名千舞者武舞之別名籥舞者文舞之別名文舞又謂之羽舞○疏言千則有戚禮記朱干玉戚冕而舞大武言籥則有羽籥師教國子舞羽吹籥○禮書千盾也以革為之其背曰瓦設錫朱質而繪以龍龍之外又繪以雜羽其繫之也以繡韋其屬繡



於彼織組者總紕於此而成文於彼皆動於近而  
成於遠○三章翟雉屬○渥厚漬也言漬之久厚  
則有光澤如厚漬之丹言赤而澤○儀禮公燕羣  
臣大夫為賓宰夫為主人賓與卿大夫入即位主  
人獻賓及公卿大夫酢酬畢席工于西階上小臣  
納工工四人二瑟升自西階北面坐歌鹿鳴四牡  
皇皇者華卒歌主人洗升獻工工左瑟一人拜受  
爵主人西階上拜送爵薦脯醢衆工不拜受爵有

脯醢○題下語錄問簡兮詩張子謂其迹如此而

其中有過人者夫能卷而懷之是固可以為賢然  
以聖賢出處律之恐未可以為盡善曰古之伶官  
亦非甚賤其所執者猶是先王之正樂故獻工之  
禮亦與之交酢但賢者而為此則自不得志耳○

侏儒俳優蓋亦衰世用之非樂中所當用者樂記  
今夫新樂進俯退俯姦聲以濫溺而不止及優侏  
儻獲雜子女不知父子樂終不可以語不可以道

古此正言後世之樂也俯猶曲也僞即儒獲乃刀  
反獼猴也舞者如獼猴戲

泉水

邶十

衛女思歸

經○詩緝不瑕有害未為瑕過而有害也子金子不  
為瑕疵而有害乎

傳釋諸姬為姪娣釋姑娣則曰諸姬夫姪娣從  
嫁者也故可與謀若姑與娣則豈亦在所嫁之  
國而可問之哉詩緝既出適於人則與父母兄



弟相遠矣今父母終唯姑姊尚存問其安否感親之歿而念骨肉之存者也當從此說

傳○一章泉淇皆衛水因思之而起興○共居容反慮凌如反○姬衛姓故得為姪姊○二章毛氏祖而舍輶飲酒於其側曰餞疏輶謂祭道路之神輶本山行之名道路有阻險故封土為山象伏牲其上天子用犬諸侯羊卿大夫酒脯既祭處者於是餞之飲於其側禮畢乘車輶之而去喻無險難也

輶蒲末反輶音歷○又漢書黃帝之子累祖好遠  
游而死於道故後人祭以為行神今案凡祭皆祭  
其神而以人鬼配如社稷則祭土穀之神而以后  
土棄配然則輶祭則祭道路之神或以累祖配也  
○三章王應麟困學記聞隋志邢州內丘縣有于  
言山又李公緒記云柏人縣有于山言山柏人邢  
州堯山縣

案毛氏注脂牽其車疏既脂其車又設其輶是

注疏皆以脂牽兩言之也字書牽車軸耑鍵今  
字亦作轄其物以金為之無事則脫行則設之  
盖軸穿於轂而牽則貫於軸之兩耑而鍵夫輪  
者也今脂則脂其軸與轂牽則加其鍵也鍵巨  
展反

四章疏同出異歸曰肥泉○漕見擊鼓○寫除也  
詩緝寫謂傾而除之也曲禮器之漑者不寫

北門

五邶十

賢者不得志

經○李氏表記君子不以小言受大祿不以大言受小祿以大言受小祿是不見知於君所不當受也衛臣終窶且貧不見知於君也非專較廩祿之厚薄也

外不見知於君而不得行其志內為窶貧之故而有室人之謫困於內外極矣乃一歸之於天非知命樂義之君子能如是乎

傳○題下懟見邶柏舟懟直類徒對二反怨也

北風

邶十

君子見幾而作

經○語錄問狐與烏以比何物曰不但指一物而言

當國將危亂之時凡所見者無非不好底氣象○  
詩記同車不必指貴者特協韻耳

靜女

邶十

淫奔之男 異

經○語錄問傳以靜女為淫奔期會之詩以靜為閒  
雅之意不知淫奔之人相與狎溺何取乎閒雅曰  
淫奔之人不知其為可醜但見其為可愛耳以女

而俟人於城隅安得謂之閒雅而此曰靜女者猶  
日月所謂德音無良也無良則不足為德音矣而  
曰德音者愛之之辭也

首言城隅末言自牧蓋不特俟於城隅抑且相  
逐於野矣

傳○一章躑躅反躑厨玉反行不進貌○卒章牧  
見小雅出車

新臺邶十國人惡宣公

經○詩緝此詩齊人作

傳○一章困區倫反義見伐檀傳○二章洒詩記水  
光中見其臺之高峻○三章易離麗也注麗猶著  
也著直略反

二子乘舟

北邙九

國人憐二子

經○詩緝自衛適齊必涉河首章言伋壽二子乘舟  
涉河以適齊其影汎汎然何所歸乎為其將見殺  
顧其影而憐之也我念而思之中心養養然憂不

知所定也二章言二子汎汎然從此逝矣痛其往而不返也詩人深求其心之無他而恕之故曰不為瑕過而有害也○子金子不瑕有害謂本無瑕疵而有禍害也

傳○一章左氏傳桓公十六年初衛宣公烝於夷姜

夷姜莊公妾宣公庶母上淫曰烝

生急子

即

為之娶于齊而美公

取之生壽及朔夷姜縊

夫寵故

宣姜與朔搆急子公

使諸齊使盜待諸莘將殺之壽子告之使行不可



曰棄父之命惡用子矣有無父之國則可也及行  
飲以酒壽子載其旌以先盜殺之急子至曰我之  
求也此何罪請殺我乎又殺之今案傳與此文不  
同者傳悉從毛氏文也○詩緝衛自宣公殺伋壽  
以朔為世子代立是為惠公左右公子怨朔之讒  
殺伋乃作亂立黔牟惠公奔齊其後諸侯納惠公  
黔牟奔周惠公怨周之容黔牟與燕伐周立子頹  
為王惠公奔溫及惠公卒子懿公立百姓大臣猶

以殺伋之故皆不服狄乘其釁殺懿公而滅衛嗚呼衛之亂極矣父子兄弟君臣之間相殘相賊不唯流毒子孫啓侮夷狄以之殺身亡國其餘殃所漸且稔王室之禍蓋綱常道盡天地幾於傾陷矣推原亂根始於夫婦之不正衽席之禍一至此邪以是知詩首闕睢聖人之意深遠矣

衛宣淫於上下父子夷戮人道絕矣無足論也惜乎伋之死未得其所爾伋非得罪於父特朔

母子之構也壽既告之逃以自免不陷父於惡  
斯可矣而以棄父命為辭必於就死是以從令  
為孝而擇義未精者也或曰宣姜故伋妻也今  
欲立其子非殺伋不可其譖之也必誣之以中  
冓之言或有令將之意若驪姬之譖申生者假  
使伋子而出誰許之乎曰君子之處事以其有  
愧於心焉否爾苟當於理而於心焉無愧則何  
卹於人言昔者大舜嘗為之矣毋譖之也為象

奪嫡也瞽瞍欲殺之愛少子也其事與伋無異  
焉完廩浚井逃而得免於聖人之德未嘗少損  
伋子於此取法焉可也而守區區一節之義豈  
非擇之未精者邪曰春秋書晉侯殺其世子申  
生直稱晉侯而斥殺是專歸罪於獻公而不及  
申生何也曰春秋端本澄源之書也獻公嬖色  
愛庶戕嫡亂國禍生於君故專罪晉侯以為萬  
世為君者之戒然則成父之惡以致簡書之斥

者誰歟則責申生之意亦在言外矣古人以申  
生為恭世子故論伋子當與申生同科曰若是  
則父命終可抗邪曰抗父之命為不孝庸人之  
所能知君子則有義焉爾父生之子事之則宜  
致死焉固常道也而父子主恩今乃賊恩而殺  
其子以無罪尚可謂之人乎故子從父之逆命  
為恭之小陷其父以滅人倫為害義之大是以  
去彼而取此也孤竹君嘗以治命立叔齊而終

不從以失義也夫廢嫡立庶與無罪而殺子有  
逕庭矣叔齊於其小者不忍累其父寧困餓而  
不顧聖人深許其仁豈謂之抗父哉故首止之  
盟春秋是之夫天王以愛易子諸侯以義定之  
一舉而父子君臣之道皆正是故夫子又稱之  
曰管仲相桓公一匡天下民至于今受其賜微  
管仲吾其被髮左衽矣盖有父子君臣則為中  
國失則為蠻夷矣由是觀之君子以擇義為大

也然則壽之死也如之何曰壽知愛其兄而已  
不知加父之惡也

廊一之四

變二

柏舟廊一共姜自誓

經○箋舟在河中猶婦人之在夫家是其常處○詩  
緝父母者子之天夫者婦之天今父與夫俱不存  
惟母是我所天也何不信我而欲奪我志也

它它適也慝邪之匿於心者也它適而誓之死

靡為之其事猶顯至於一念邪思之微亦誓至死而靡發可見其心之貞固而節不可渝矣○

共姜之時先王遺澤尚在闕睢之化猶有存者故姜之守義雖或天性貞潔然教化之道不可誣也當時衛之風俗固因以厚矣而先儒說詩者以衛之淫風大行僅得共姜故聖人錄之以為鄘首盖考之未詳爾衛自康叔傳九世至釐侯史皆無事可載釐侯立於厲王二十五年子



武公立於宣王十六年皆東遷之前在釐侯時  
有共姜暨武公修康叔之政百姓和集其終也  
謚曰睿聖武公觀於淇奧抑詩可見則當時衛  
俗安有不善者乎自其子莊公不禮於莊姜馴  
致州吁之亂而宣公立宣淫於上下而淫風始  
流行不可禁矣但詩各因一事而發聖人唯欲  
取之以示勸戒固不必論時之先後為次第也  
讀者詳之

傳○一章髦疏禮注兒生三月翦髮為鬚男角女羈  
否則男左女右長大猶為之飾存之謂之髦所以  
順父母幼小之心若父母沒則脫之諸侯小歛脫  
髦士既殯脫髦若父母有先死者脫之至服闋又  
著二親並歿則因去之夾凶曰角午達曰羈內則  
櫛緋笄總拂髦冠是著於冠之內也髦之制未聞  
鬚徒果反閔苦穴反凶思晉反緋所買反○去起  
呂反○共音恭共伯衛釐侯子名餘武公兄○奪

謂奪其守義之心○覆乎救反

牆有茨

鄘二刺宣姜

傳○一章詩記前漢梁王襄傳聽聞中冓之言注應劭曰中冓材構在堂之中也顏師古曰冓謂舍之交積材木也蓋閭內隱奧之處中冓之言若曰閨門之言也○惠公名朔即構伋子者左氏傳閔公二年惠公之即位也少齊人使昭伯烝於宣姜不可強之生齊子戴公文公宋桓夫人許穆夫人昭

伯即公子頑宣公之長庶伋之兄也

君子偕老

鄘

三刺宣姜

經○一章副敷救反

首章三截上二句言夫人能與君子偕老則得有副笄之服既服此則宜從一而偕老中三句正言宣姜威儀容貌稱其象服下二句言今乃不善將云何哉中三句應副笄六珈下二句應君子偕老○象服與予觀古人之象同○胡然

而天也胡然而帝也謂夫人容貌之美服飾之  
盛固無以加然而無德則人胡然而尊之如天  
胡然而敬之如帝此則與上下兩章末句皆刺  
之也一說容貌服飾如此胡然而自天降此乎  
胡然而鬼神來此乎此則問辭後章末則答之  
曰此邦之媛也一說容貌服飾之盛胡為而在  
此乎其自天而降也胡為而在此乎其鬼神也  
此雖疑辭而却非問辭上說疑在胡然字此說

疑在天帝字

傳○一章天官追師掌王后之首服為副編次注副之言覆所以覆首為之飾其遺象若今步繇服之以從王祭祀疏步繇謂在首之時行步繇動此據鄭時目驗以曉古至今去漢久遠亦無以知之追丁回反編步典必先二反覆芳救反繇與搖同今案鄭說禮如此而箋詩亦曰如步搖皆不言步搖之制毛注副者后夫人之首飾編髮為之

後漢書和熹鄧后記注皇后首副其上有垂珠步則搖然不知步搖之身亦編髮為之否也蓋謂之似步搖固已全非步搖之制自作疏時已不知之則副之為物今不可考矣

追師又曰追衡笄注追猶治也王后之衡笄皆以玉為之唯祭服有衡垂于副之兩旁當耳其下以紃縣瑱笄卷髮者紃都感反縣音懸瑱他甸反卷音捲

今案鄭說禮如此是以衡筭為二物毛注筭衡  
筭也是以衡筭為一物愚竊以鄭說為是蓋副  
有衡復有筭詩言副則有衡可知別舉筭則謂  
有六珈飾之盛也

疏六珈必飾之有六但所施不可知

今案珈字從玉是以玉加飾於物也然追者治  
玉之名筭既以玉為則珈亦未知以何為飾而  
其制為何



紃織如條上屬於衡以懸瑱者也瑱以玉為之以  
續縛之而屬於紃懸之當耳縛音篆卷也○二章  
翟衣見葛覃○繒慈陵反帛也○髻益髮疏已髮  
少聚他人髮益之左氏傳哀公十七年衛莊公見  
己氏之妻髮美使髻之以為呂姜髻是也摘他狄  
反○三章裋釋文符袁反毛注是當暑裋延之服  
疏裋延是熱之氣紃裋去熱之名言是當暑紃去  
裋延之服也則紃字作泄字意解今傳作薄慢反

而云紕絆束縛意案說文絆博慢反而傳意絆字如絆字意是紕絆為連綿字共成束縛意也然薄慢反恐誤當如說文切

桑中廊淫者異

傳○一章爾雅唐蒙女蘿女蘿兔絲注別四名疏唐與蒙或并或別別則四名也本草夏生苗如絲蔓延草木上或云無根假氣而生實如蠶子爾雅又出一條曰蒙玉女注蒙即唐尤見唐蒙之別傳唐

蒙菜也從毛注也但唐非可食之物不知毛為何  
以為菜名○姜大率言貴族以誦女之美未必真  
有姜弋庸三姓○二章春秋襄公四年夫人如氏  
薨公羊傳作弋氏薨定公十五年如氏卒穀梁傳  
作弋氏卒○題下比毗志反同也漢音卜衛水名  
○史記衛靈公之晉至濮水之上夜聞鼓琴聲召  
師涓曰吾聞鼓琴狀似鬼神為我聽而寫之師涓  
曰諾去之晉靈公令師涓援琴鼓之師曠止之曰

此亡國之聲不可聽師延與紂為靡靡之樂武王伐紂師延東走自投濮水之中故聞此聲必於濮水之上先聞此聲者國削

序○譙以辭相責讓以禮辭責之質者正也責誚也哇邪也哇淫非正曲也

鶉之奔奔

鄘五

刺宣姜子頑

傳○一章爾雅曰鶉鶉注鶉屬疏鶉一名鶉又曰鴛鴦注鶉也青州呼鶉母疏鴛鴦田鼠所化鶉蝦蟆

所化爾雅又曰鷦其雄鷽牝痺又曰鷽子鷽駕子  
鷽然則又有雌雄子母非盡化者矣鷽音僚鷽烏  
含反駕音如鷽音年蝦音霞鷽音麻鷽音皆痺音  
脾鷽音文鷽音寧

定之方中

鄘

六美衛文公

經○詩記升彼虛矣以領略其大勢降觀于桑以細  
察其土宜○詩記建國之初憂民之不得其所不  
敢遑寧曰終焉允臧者喜其果遂於志願也○詩

記淵虛明如淵也塞則多不明塞淵則實而明

傳○一章晉天文志營室二星天子之宮也一曰玄

宮一曰清廟又為土功事爾雅營室謂之定注  
正也作宮室皆以營室之中為正○疏鄭志楚丘  
在濟河間疑在今東郡界杜預云楚丘濟陰成武  
縣西南猶在濟北故云濟河間○通典滑州衛南  
縣衛文公自漕邑遷楚丘即此○度徒角反梟魚  
列反○冬官匠人建國水地以縣置槷以縣眡以

景為規識日出之景與日入之景晝參諸日中之  
景夜考之極星以正朝夕注疏於造城郭處四角  
立四柱於柱四畔縣繩以正柱柱正然後以水平  
之法遙望柱高下定即知地之高下然後平高就  
下地既平於其中央樹八尺之臬於四角四中以  
八繩縣之臬既正乃於日出日入之時畫記臬景  
之端却於中臬以繩取景兩端之內一市規之規  
之則遠近定而東西審度兩交之間中屈之以指

梟則南北正恐其不審猶更以日中之景參之也  
朝夕即東西景也傳正取此文縣音玄繫梟同眊  
視同識音志○爾雅椅梓注即楸說文亦曰椅梓  
也梓楸也是為一物矣然經言椅又言梓故疏云  
楸之疏理而生子者為梓梓實桐皮曰椅則大類  
同而小別也○桐種不一諸家說亦多相亂惟寇  
宗奭本草衍義條其狀白桐可斲琴葉三杈開白  
花不結子梧桐開淡黃小花如棗花枝頭出絲墮



地成雨露漬衣履五六月結子然則白桐即今俗所謂毛桐詩之樹桐為琴瑟蓋白桐也梧桐不堪作琴瑟傳蓋誤○吳正傳案家語山有梓實而俯楸屬亦多喬聳但以實而俯者求梓則得之矣○

二章杏溪傳寅羣書百攷堂當是今博州堂邑通典以為漢舊縣則堂邑之稱從來久矣博濮二州連境後衛成公自楚丘徙濮陽濮陽古屬濮州則知堂邑亦衛邑也○二章景山後說為是蓋測景

之事首章已言之而於此句之上有望字下有觀字則皆相視地形之意又毛曰景山大山也○三章非獨訓匪直字以兩句作一連說直如孟子非直為觀美也○詩緝左傳言元年革車三十乘季年乃三百乘是實有之數三百乘計一千二百匹周禮校人邦國六閑馬四種齊道田馬各一閑駕馬三閑閑二百一十六馬六閑計一千二百九十六馬則三百乘正合侯國之數今云三千者革車

不用牝馬今併牝馬數之故為三千亦見諸侯各

務富强不守舊制○題下燬虎委反○左氏傳閔

公二年冬十二月狄人伐衛衛懿公好鶴鶴有乘

軒者將戰國人受甲者皆曰鶴實有祿位余焉能

戰

史記謂懿公  
淫樂奢侈

公及狄人戰于熒澤衛師敗績

史記

殺懿公

國人出狄入衛遂從之又敗諸河宋桓公逆

諸河

桓夫夫人  
宣姜女

宵濟衛之遺民男女七百有三十人

益之以共滕之民為五千人

共滕皆  
衛別邑

立戴公以廬

于曹齊侯使人帥車三百乘甲士三千人戌曹歸  
公乘馬祭服五稱牛羊豕雞狗皆三百與門材歸  
夫人魚軒重錦三十兩僖公二年齊桓公合諸侯  
城楚丘以封衛衛國亡○大布麤布大帛厚繒蓋  
用諸侯諒闇之服惠工加惠百工賴其利器用授  
方授百事之宜今詳布衣帛冠蓋不止用於戴公  
喪期之中此正文公貶損自警如越王卧薪嘗膽  
之意

蝮螫

廊刺淫奔

經

此詩前二章刺女子後章兼刺男女若果文公  
時詩真可見天理民彝未嘗一日可以泯絕而  
感應之速其效有如此者然則網淪彝斁實自  
上為之非下之罪也衛因淫邪以致禍敗其亂  
極矣文公一轉移之民之知義乃如此且其辭  
非止論事常言而達禮知命真君子之言也○

禮曰信事人也信婦德也

傳○一章遠于萬反紐音今易于願反○爾雅螾螭謂之雩螾螭虹也蛻為挈貳注虹江東呼雩俗名為美人虹蛻雌虹也挈貳其別名疏虹雙出色鮮盛者為雄雄曰虹闇者為雌雌曰蛻闇音暗螾即蛻○二章春官經注疏眡祲掌十輝之法以觀妖祥辨吉凶輝謂日旁之光氣一曰祲陰陽氣相侵赤雲為陽黑雲為陰二曰象如赤烏三曰鑄日旁

雲氣刺日四曰監赤雲氣在日旁如冠珥五曰闇  
日月食六曰朧日月無光七曰彌雲氣貫日而過  
八曰叙雲氣次序如山在日上九曰隤虹也十曰  
想雜氣有似可形想衺子鳩反輝音運鑄許規反  
鄉音向珥仍吏反朧母豆反

相鼠鄺序以為文公作

經○詩緝凡獸皆有皮齒體獨言鼠者舉卑汙可惡  
之物以惡人之無禮也

千旄九廊詩人美大夫好善

傳○紕符至反類隔切今易毗至反○後世或無翟羽染鳥羽為之謂之夏米夏上聲

旄旗旄今案周禮爾雅禮書參比而得其說曰凡旗有杠有繆有旒杠者旗竿也其首以旄牛尾注於其上又以翟五色之羽析之注于旄之上謂之旄則旄旌皆是杠之飾也旄與髦同其杠以素錦韜之然後以繆繫于杠繆以纁帛為之纁



絳色也旒亦絳帛而屬於縵之上以俗言之則  
縵是旗身旒是旗脚又以組飾旒之邊又用朱  
纁縫紕旒縵或以維持之不欲令曳地凡旗則  
自王以下各有所建旗上所畫則各有其物旗  
州里所建者也其上畫鳥隼鳥與隼二物也縵  
及旒皆畫之或者以為大司馬百官載旗乃卿  
大夫仲秋教治兵所建而司常州里建旗亦大  
閱時也見賢載旗無明文以疑此詩然司常下

文明言賓客亦如之而陳祥道曰州里建旗者  
州里之常百官載旗者一時之事軍國之容固  
不同耳此詩第二章千旗乃是箋所謂州長之  
屬疏所謂鄉內州長黨正遂內鄩長里宰鄰長  
等同建者也一章三章旒旌皆因旗而言紕者  
縫之也組者飾之也祝者維之也杠音江繆音  
衫旒音流旂同韜音滔屬音燭

載馳

鄘

十許穆夫人

經○一章唁疑戰反

案閔公二年冬十有二月狄入衛宋桓公立戴公以廬于曹許穆夫人賦載馳是年戴公卒而文公立然則戴公之立與卒在一月之間爾周十二月今十月也於是采蟲與麥之芄芃皆非其時特託意以言之如卷耳草蟲之類不必以為實然也盖夫人欲歸唁衛侯知於義不可而極其思託意賦此詩也言我馳驅歸唁衛侯而

驅馬悠悠言必至于漕今許大夫雖往弔有跋  
涉之勞然我心則憂不鮮也其不可歸之義夫  
人豈不知乎於是託許人諫不可往之義而言  
曰汝既不以我歸為嘉則信不能旋反而濟視  
爾雖不以我為善然我之思則不遠也不止也  
亦陟彼阿丘言采蠹以舒鬱結乎雖曰女子多  
思亦各有其道也許人皆尤我以思之太過是  
直童幼狂妄之言爾我之所思豈徒欲往唁之

而已乎許國之小力不能救將控告于大國以救之又設行野見麥之意且憂控大國誰因誰極乎大夫君子無以我為有過盖百爾所思不如我之自往也

傳○一章杜預春秋世族譜許姜姓與齊同祖堯四岳伯夷之後周武王封其苗裔文叔于許今潁川許昌是也自文叔至莊公十一世始見春秋今案許男爵穆公名新臣見僖公四年○三章蟲本草

貝母根有瓣子黃白色如聚貝子故名貝母爾雅  
作蔕音萌○少失照反

衛一之五

變三

淇奧衛一君子美武公

經○語錄問淇奧一篇衛武公進德成德之序始終  
可見一章言切磋琢磨則學問自修之功精密如  
此二章言威儀服飾之盛有諸中而形諸外者也  
三章言如金錫圭璧則鍛鍊已精溫純深粹而德

器成矣前二章皆有瑟僖赫喧之詞三章但言寬  
綽戲謔而已於此可見不事矜持而周旋自然中  
禮之意曰說得甚善武公學問之功甚不苟年九  
十五歲猶命羣臣使進規諫至如抑詩是他自警  
之詩後人不知遂以為戒厲王畢竟周之卿士去  
聖人近氣象自是不同○二章琇音秀

武公之所以有德全在切磋琢磨四字惟其工  
夫如此精密故有瑟僖赫喧之效存於內者周

故發於外者著下二句却就他人心上說謂此君子不可忘一章總言其講學自修之功敬德容儀之盛二章止言正其衣冠則其德容自充盖至此德成矣三章言守之於心者貞剛如金錫施之於四體者溫粹如圭璧至於倚較則寬綽戲謔則不虐盖動作之間無所往而非德容之盛也

傳○一章見音現鑣良豫反錫它浪反槌直追反復



扶又反恂音峻

此章訓詁解義皆不及大學詳明曾子謂瑟兮  
憺兮恂慄也是瑟憺以存諸中者言所以章句  
謂嚴密武毅貌傳乃釋為矜莊威嚴是就外言  
則與曾子所謂赫兮喧兮威儀者若有重意解  
上文亦詳於此蓋大學朱子晚年之書讀此章  
者當從大學

二章瑱它甸反縫扶用反○夏官弁師王之皮弁

會五采玉璫象邸諸侯及孤卿大夫各以其等為之注疏皮弁之縫中每貫結五采玉十二以為飾謂之璫五采玉朱白蒼黃玄之玉也邸下抵也謂於弁內頂上以象骨為抵侯伯璫飾七子男璫飾五玉三采朱白蒼孤則璫飾四三命之卿璫飾三再命之大夫璫飾二玉二采朱綠璫音其邸抵並丁禮反○三章棧仕限反牀第也第壯仕反比毗至反○猗釋文於綺反依也只是倚義今音同首

章而為歎辭恐於字義及句義皆若不協當從釋  
文○禮書輿人之法車廣六尺六寸三分車廣去  
一以為隧則輿深四尺四寸矣三分其隧一在前  
二在後以揉其式則式深一尺四寸三分寸之二  
矣以其廣之半為之式崇則式三尺三寸矣以其  
隧之半為之較崇則較出於式二尺二寸矣式圍  
七寸三分寸之一較圍四寸九分寸之八周禮注  
較兩轆上出式者疏較謂車輿兩相今人謂之平

馬也言兩較謂車相兩旁豎之者二者既別而云較兩轎上出式者以其較之兩頭皆置于轎上二木相附故據兩較出式而言之蓋天子與其臣乘重較之車諸侯之車不重較詩疏則曰重較侯伯之車也此二說不同遂與邃同車輿深也揉汝九反轎於綺反○易以豉反中竹仲反○題下長知丈反朝直遙反舍始野反

考槃

衛

二詩人美賢者

經○詩緝永矢弗諼弗過弗告亦作詩者形容其高  
舉遠邈有終焉之意耳賢者不自言其如此也

考槃在澗可謂幽僻碩德之人居之則見其寬  
廣此君子居之何陋之有之意於是獨寐於此  
寤而自言誓永弗忘此樂矣二章同意歌則長  
其言也至曰宿則惟於此留止且不以語人是  
邈世無悶自樂於心并其言忘之矣

碩人衛閔莊姜

傳○一章禪音丹○裝字書糝也糝泉屬爾雅翼糝

高四五尺或六七尺葉似苧而薄實如大麻子今  
人績為布盖用此布為禪衣故謂之裝語錄意同  
箋夫人翟衣而嫁今衣錦者在塗之所服下章則  
自近郊正衣服乘車馬以入○春秋杜預注邢國  
在廣平襄國縣通典邢州龍岡縣邢遷夷儀即此  
廣平唐為洺州邢州則鉅鹿郡也攷異邢國故城  
在邢州外城內西南角殷時邢侯國周公子封邢

侯居此○春秋注譚國在濟南平陵縣西南即今

濟南府之歷城縣○重直用反○二章蝤釋文與

傳反切同然字書皆自秋反恐釋文誤爾雅蝤蟪

蝓此蟪蝓之類蝤蟪在木中蟪蝓在糞土中○比

毗志反○爾雅蝓蟪蟪注如蟬而小有文者謂之

蟪蝓音札蟪音精○疏輔牙外之皮膚頰下之別

名○三章釋文鑣馬銜外鐵一名扇汗又曰排沫

爾雅謂之鑣魚列反○翟第見召南何彼穠矣○

諸侯三門庫雉路三朝路寢在路門內內朝在路門外則外朝在雉門外矣日出而視朝者內朝也○諸侯路寢一在前小寢二在後東西建○四章疏鱣鮪出江海三月中從河下頭來上鱣身形似龍銳頭口在頷下背上腹下皆有甲縱廣四五尺今於盟津東石磧上釣取之大者千餘斤可烝為臠又可為鮓魚子可為醬鮪魚形似鱣而青黑頭小而尖似鐵兜鍪口亦在頷下其甲可以摩薑大



者不過七八尺大者為王鮪小者為鮓鮓肉色白  
味不如鱸也盟莫更反臃黑各反羹也磬音年鮓  
音叔○亂五患反莢亂荻並見秦蒹葭○佼古巧  
反好也

氓衛淫奔被棄自悔 異

經○詩緝一章述始者已為男子所誘而已許之奔  
二章述已為男子所惑而遂奔之三章述其既奔  
而悔四章述其愛弛而見棄五章述其至家而羞

見兄弟六章述其怨而自解之辭○二章涕它禮  
反詩緝漣漣涕出接續之貌○四章箋女家乏食  
已三歲貧矣女音汝○卒章詩緝將與汝偕老今  
我未老而已見棄若我從爾至老其被暴戾必有  
甚者愈使我怨也舊說以老使我怨為今老而見  
棄據此詩言總角之宴則此婦人始笄便為此氓  
之婦又言自我徂爾三歲食貧又言三歲為婦是  
正及三年便見棄不應便老也○下濕曰隰

傳○一章朱子初言氓者見其來莫知其為誰何也  
既與之謀則爾汝之矣此言之次第○布訓幣毛  
氏文疏幣者布帛之名今案天官外府注布泉也  
其藏曰泉其行曰布疏布泉一也即錢也若布作  
錢說亦通○漢志東郡有頓丘縣○狡古巧反猾  
也○三章爾雅鷖鷖鷖注與傳同疏春來秋去  
一名鳴鳩月令鳴鳩拂其羽鷖居物反鷖音骨鷖  
音嘲詳見小雅小宛○四章疏童容以幃障車之

傍如裳以為容飾故或謂之幃裳此唯婦人之車  
飾為然○復扶又反○卒章反復之復芳服反○  
左氏傳襄公二十五年衛太叔文子曰君子之行  
思其終也思其復也

竹竿衛女思歸

傳○一章殺色界反衰小之也長而殺謂釣竿長而

根大其末漸漸衰小○二章遠見鄘蛺蝶○四章

毛氏檜柏葉松身

芄蘭

衛六

不知所謂異

經○子金子芄蘭之詩雖不知作者之本意大意柔弱之人不稱其服芄蘭蔓生纏繞非特達之物如童子雖有衣服之飾而垂帶悸兮便有羞澀驚悸之意

芄蘭柔弱之草其枝葉不足取以興童子無才智而居大人之位不足尚故雖服成人之佩而智不足以知我才不足以長我猶且不能自省

而舒緩放肆垂帶悸然以自得蓋惟知處尊高之位侈然以樂其身而不知所以處之之道故為人指議如此蓋人君柔弱不能勝任大夫以是刺之但無以見果為何君而發爾朱子以爲不知所謂今依朱子訓詁而爲說如此子金子之意又有不同者

傳○一章芄蘭爾雅一名藿陸璣蔓生葉青綠色而厚摘之白汁出食之甘脆鬻爲茹滑美其子長數

寸似瓠子隴音貫驚音煮○啖徒濫反○二章閨  
與開同羈苦侯反皆釋文待荅反當作託荅反冒  
也將子匠反長知丈反

河廣

衛

宋桓夫人思子

傳○一章詩記說苑曰宋襄公為太子請於桓公曰  
請使目夷立公曰何故對曰臣之舅在衛愛臣若  
終立則不可以往味此詩而推其母子之心蓋不  
相遠所載似可信也不曰欲見母而曰欲見舅者

恐傷其父之意也母之慈子之孝皆止於義而不  
敢過焉不幸處母子之變者可以觀矣○與祖為  
體以昭穆言也○疏一葦謂一束○疏文公之時  
衛已在河南適宋不渡河北假有渡者之辭非喻  
夫人之嚮宋渡河也宋今睢陽去衛甚遠言宋近  
猶喻河狹

案春秋傳莊公十二年宋桓公立僖公九年卒  
子襄公立閔公二年狄入衛宋桓公逆衛遺民



於河立戴公是年卒文公立文公元年即僖之  
元年也今傳曰衛在河北宋在河南是以狄未  
滅衛之前言之也而言河廣之詩作於襄公即  
位之後則衛不在河北矣其說自相牴牾若據  
經一葦杭之為實則為衛在河北而襄公為太  
子之時若以一葦杭之為假設之辭則可為襄  
公即位之後而衛非河北矣二者必有一是一  
非然觀桓公迎衛之意似此時未出夫人也桓

公卒於衛文之八年不知何年出之然則衛在河北之說為誤而此詩作於襄公為太子時與即位之後則未可知也

題下衛有婦人之詩六人皆止於禮義謂共姜也莊姜也許穆夫人也宋桓夫人也泉水之女也竹竿之女也

伯兮

衛

婦人思其夫

傳○一章及說文積竹為之冬官廬人及長尋有四

尺即丈較兵同強

及無刃可較打人故謂之圍欲

細舉圍欲重

舉謂手所操

五分其長以其一為之被而

圍之

之被把中也圍之也

參分其圍去一以為晉圍

晉讀如措

謂下鑄也矜所捷也矜柄也鑄存問反

五分其晉圍去一以為首圍

首也

注圍之大小未聞其矜八觚較與擊同被皮

義反把音霸矜渠巾反觚音孤○二章戰國策晉

豫讓曰士為知己者死女為說己者容說弋雪反

○三章思相字反○卒章疏房室所居之地總謂

之堂房半以北為北堂房半以南為南堂

此蓋專指東房

而言此是北階入內寢處

○題下文王遣戍役采薇出車扶杜

詩周公勞歸士東山之詩也

有狐

衛

寡婦思婚姻

異

傳○一章妃配同○二章凡帶有二革帶加裳上所  
以懸佩大帶加衣上所束衣而為禮申重也申  
束衣并革帶而數之也

序○會男女之無夫家謂未成室家而不得授夫家

之田者

木瓜

衛

男女贈答 異

經

此雖淫邪相贈答之辭然推而充之亦足以為  
法蓋彼施者雖輕我報者當重不以彼已相較  
而效之此厚之道也而猶曰匪報蓋如此則可  
永其好爾至於以薄加於我者則當曰寧人負  
我無我負人如張子所謂不要相學者可也

傳○一章榘音茂爾雅木瓜榘疏木瓜一名榘故傳

曰榘木○酢七故反○李氏江左右者名榘其實  
如小瓜而有鼻食之津潤而不香者謂之木瓜圓  
而小於木瓜食之酸澀而香者謂之木桃似木瓜  
而無鼻而其品又為下謂之木李今案此言未知  
是否○据者處佩之中所以貫蠙珠而上繫於珩  
下維璜衝牙者也蠙步眠反○三章釋文玖石黑  
色

衛詩譜

衛自康叔至釐侯九世釐侯四十二年卒子武公  
和立五十五年卒子莊公楊立二十三年卒子桓  
公完立十六年弟州吁弑之自立是年國人殺之  
立宣公晉十九年卒子惠公朔立三十一年卒子  
懿公赤立九年狄滅衛戴公申立而卒弟文公燬  
立二十五年卒子成公鄭立三十五年卒子穆公  
遯立十一年卒衛詩三十九篇今可譜者二十二

篇自釐侯至穆公十二君二百六十六年可見者  
如此耳其十七篇不知何世不可譜朱子說詩與  
鄭不同故不從鄭譜

鄘柏舟

右釐一詩

淇奥

右武一詩

邶柏舟

綠衣

日月



終風

碩人

右莊五詩

燕燕

擊鼓

右州吁二詩

新臺

二子乘舟

右宣二詩

牆有茨

君子偕老

鴉之奔奔

右惠三詩

載馳

右戴一詩

定之方中

蠲螬

相鼠

干旄

河廣

右文五詩

式微

旄丘

右穆二詩

簡兮

北門

二詩疑  
莊後

凱風

匏有苦葉

靜女

桑中

氓

木瓜

六詩皆淫  
疑宣世

北風

疑懿  
世

有狐

疑戴  
文世

雄雉

谷風

泉水

考槃

竹竿

芄蘭

伯兮

右十七詩前十詩有所疑而不敢必後七詩  
不可知何世

詩集傳名物鈔卷二



覆校官編修臣張秉愚

校對官編修臣李光雲

膳錄監生臣趙存與